



KEMENTERIAN WILAYAH PERSEKUTUAN

Blok 2, Menara Seri Wilayah, Presint 2, 62100 Putrajaya

Tel: 03-8000 8000 Faks: 03-8889 7957

Laman web: www.kwp.gov.my

SIARAN MEDIA

UNTUK LIPUTAN MEDIA MASSA

“TRAK TANI WILAYAHKU”- DEKAT, MURAH DAN SEGAR

PUTRAJAYA, 24 Mei 2019 – YB Tuan Haji Khalid Bin Abdul Samad, Menteri Wilayah Persekutuan hari ini merasmikan Program Trak Tani Wilayahku dengan menyerahkan lima buah trak tani kepada pengusaha terpilih. Inisiatif ini merupakan salah satu program bagi mengurangkan kos sara hidup rakyat terutamanya membeli barangan keperluan harian.

Program ini merupakan kerjasama strategik antara Kementerian Wilayah Persekutuan dengan Lembaga Pemasaran Persekutuan (FAMA). Usahasama ini dibuat bagi mengawal rantai bekalan barangan harian daripada pengeluar terus kepada pengguna. Melalui kaedah ini rakyat dapat membeli barangan yang berkualiti pada kadar harga yang lebih berpatutan dan murah. Kaedah ini dilihat dapat mencegah berlakunya manipulasi oleh orang tengah yang menyebabkan harga barangan keperluan harian meningkat.

Program “Trak Tani Wilayahku” akan beroperasi secara berskala kecil, mudah bergerak dan lebih *hygiene*. Menggunakan konsep ‘dekat, murah dan segar’, pengusaha trak tani ini akan menjual barangan keperluan harian ini terus kepada pembeli di sekitar Kuala Lumpur dan Putrajaya. Antara lokasi jualan adalah di Perbadanan Putrajaya, Kompleks C, E dan di Kementerian Pertanian dan Industri Asas Tani, Presint 4 mengikut hari jualan. Manakala di Kuala Lumpur pula trak tani akan berada di Apartment Seri Ceria, Bukit Jalil setiap hari bermula jam 7.30 pagi hingga 11.00 pagi.

Antara barangan keperluan asas yang dijual adalah seperti seperti ayam, ikan, sayur-sayuran, dan barang-barang kawalan bersubsidi seperti minyak masak, gula, tepung gandum serta beras 5kg dan 10kg. Harga jualan adalah lebih rendah dari pasaran di antara 5% hingga 20%.

Bagi membolehkan lebih ramai penduduk di Wilayah Persekutuan memperoleh manfaat daripada program ini, capaian jaringan jualan akan diperluaskan lagi ke kawasan-kawasan komuniti terutamanya di kawasan PPR seluruh Kuala Lumpur. Kementerian Wilayah Persekutuan dan FAMA komited untuk mewujudkan lebih banyak pasaran (*creating market place*) dalam masa terdekat bagi membantu warga Wilayah Persekutuan memperoleh barangan keperluan harian dengan mudah, murah dan berkualiti dengan harga yang sangat berpatutan.

Disediakan oleh :

Bahagian Komunikasi Korporat

Kementerian Wilayah Persekutuan

24 Mei 2019